



Hadithi ya Wangari Maathai

Nicola Rijsdijk
Kiswahili





Katika kijiji kimoja kwenye mteremko wa Mlima Kenya, katika Afrika Mashariki, msichana mdogo alifanya kazi za shambanin pamoja na mamake.

Msichana huyu aliitwa Wangari.

Wangari alipenda kufanya kazi za nje.
Alitumia jembe kulima katika bustani ya familia yake.
Kisha alipanda mbegu ndogo katika ardhi yenye joto.






Alipenda majira ya jioni, wakati jua lilipotua. Giza lilipozidi na kuwa vigumu kuona mimea tena, Wangari alifahamu wakati wa kwenda nyumbani uliwadia. Angefuata kijia chembamba kilichopita wanjani huku akivuka mito akielekea nyumbani.

Wangari alikuwa mtoto mwerevu na alikuwa na hamu ya kwenda shule. Lakini, wazazi wake walitaka awasaidie nyumbani. Alipofika umri wa miaka saba, kakake aliwashawishi wazazi wake kumwacha aende shule.



Alipenda kusoma! Wangari alijifunza zaidi na zaidi kwa kila kitabu alichosoma. Alifanya vyema sana shuleni hadi akaalikwa kwenda Amerika kuendeleza masoma yake huko. Wangari alichangamshwa sana na nafasi hii! Alipenda kujua ulimwengu zaidi.



Alipokuwa chuoni huko Amerika, Wangari alijifunza mengi mapya. Alisomea mimea na jinsi inavyokua. Na alikumbuka maisha yake yalivyokuwa utotoni: kucheza michezo na nduguze katika kivuli cha miti maridadi ya misitu ya Kenya.





Jinsi alivyojifunza ndivyo alivyofahamu kuwa aliwapenda watu wa Kenya. Alitaka wafurahi na wawe wenye uhuru. Jinsi alivyojifunza ndivyo alikumbuka kwao nyumbani Afrika.

Alipokamilisha masomo yake, alirudi Kenya. Lakini nchi yake ilikuwa imebadilika. Kulikuwa na mashamba makubwa kila upande. Wanawake hawakupata kuni za kuwasha moto wa kupika. Watu walikuwa maskini na watoto walikuwa na njaa.



Wangari alijua la kufanya. Aliwafunza wanawake jinsi ya kupanda miti kutokana na miche. Wanawake waliuza ile miti na pesa walizopata walizitumia kwa mahitaji ya familia zao. Wanawake walifurahi. Wangari alikuwa amewasaidie kuwa wenye nguvu na uwezo.



Muda ulipopita, miti mipya ilikuwa misitu, na mito ilianza tena kupitisha maji. Ujumbe wa Wangari ulienea Africa nzima. Leo, mamilioni ya miti imemea kutokana na mbegu za Wangari.



Wangari alikuwa amefanya bidii.
Watu ulimwengu mzima walifahamu
hili na wakampa tuzo. Tuzo hili
linaitwa, 'Nobel Peace Prize.' Na
alikuwa mwanamke wa Kiafrika wa
kwanza kupokea tuzo hilo.



Wangari aliaga dunia mwaka 2011, lakini tunaweza kumfikiria kila tunapouona mti wa kupendeza.



Hadithi ya Wangari Maathai

Writer: Nicola Rijsdijk

Illustration: Maya Marshak

Translated By: Ursula Nafula

Language: Kiswahili



© Nicola Rijsdijk, Maya Marshak, Tarryn-Anne Anderson,
Bookdash.org and African Storybook Initiative, 2015



This work is licensed under a Creative Commons Attribution
(CC-BY 4.0) Version 4.0 International Licence

Disclaimer: You are free to download, copy, translate or adapt this story and use the illustrations as long as you attribute or credit the original author/s and illustrator/s.

Book Dash is a movement of volunteers working to create open-licensed books for young readers, and get these into the hands of children. See more at www.bookdash.org.

Saide 
South African Institute
for Distance Education
www.africanstorybook.org
A Saide Initiative